

Saedceij Soengse Lajmbanj

乡村悠闲的生活

贵港市覃塘区蒙公乡廖瑞小学四(1)班 周惠婷



Vunz lajmbanj gvaq saedceij mbouj lumj vunz ndawsingz, vunz ndawsingz daengx ngoenz nyaengqnyat, vunz lajmbanj cix soengse cwxcaih.

Haetcaeux, hoengheiq lajmbanj gig singisien, hawj vunz

gamjdaengz gig cwxcaih, rumz ci hwnj naj daeuj, sawj vunz gamjdaengz gig cingsaenz. Nungzminz bohlungz boh' au couh youq gij hoengheiq singisien neix guhong: Caenaz、gvakrum、dwk-bwnh、gaebnon……Dingq! Duzroeg dwggvaez cingq angq dwk cici caca ciengqgo, gig ndeidingq, hawj lwgnyez guhcaemz caeuq mehbaj mehsimj youq henz dah dajsaeg daiq daeuj angqyangz. Diuz dah'iq najranz raemx laeyaengyaeng, sawdikdik, liengzsis, rin ndaw raemx miz hung miz iq, miz bej miz luenz, yawj ndaej cingcing cujcu, gyoengq bya'iq youq geh-rin youzyed doxgyaep, cwxcaih dangqmaz.

Seizhah banhaemh, gwnzmbwn benqfwj henjhoengz menhmenh sanq bae, rumz liengzsis ci luenh gij byoem gwnz gyaep, duzroeg ganj ma ndaw rongz haenx daj dinggyaeuj mbin gvaq, gyoengq biengzbeih hix youq gwnz dinggyaeuj gvaengxgva, gyoengq lwgnyez caeuq biengzbeih doxgyaep guhcaemz. Duzroeg duzbiengzbeih caeuq vunz lajmbanj dwg baengzyoux ndei, gyoengqde gyoebbaenz fuk dozveh whyienz huzndei gyaundeideu.

Gij saedceij lajmbanj soengse cwxcaih, vunz caeuq daswyenz huzndei caezyouq, geijlai hawj vunz sienggyaez ha.

(指导老师:冼娟凤)

Swiq Vanj

洗碗

贵港市覃塘区蒙公乡凌寺小学三(1)班 庾冰

Ngoenzneix, daxmeh bae guhhong seiz, daengq gou dawz vanj swiq seuq bae. Gou soqlaiz cij rox gaem vanj gwn ngaiz, caengz swiq vanj gvaq, baenzlawz cij swiq ndaej seuq ne? Gou yawj gij vanj uq haenx, mbouj rox baenzlawz guh. Dahcej raen gou naj saepsetset, aenbak de dep henz rwz gou naeuz: "Mbouj yungh you, mbouj rox gou son mwngz." Gou dingq gij vah dahcej le, sim ngeix: Ndae! Gou itdingh dawz vanj swiq seuq bae.

Gou daek bat raemx ndeu daeuj, dawz vanj cuengq roengz ndaw bat bae swiq. Byawz rox

baenzlawz hix swiq mbouj seuq, lumh hwnjbae cungj dwg niunetnet. Dahcej naeuz: "Gaej beg sai rengz lo, raemxgyoet dwg swiq mbouj seuq bw, aeu raemxndat daeuj swiq cij ndaej."

Gou ciuq gij vah dahcejh vuenh bat raemxndat he. Hainduj, gou cij aeu baengzswiqvanj youq ndaw vanj cienq song gien couh laihnaeuz swiq seuq lo. Dahcej lumh le naeuz: "Mbouj ndaej, lij miz youz, aeu yungh rengz swiq."

Gou mbe bak nam naeuz: "Yienghneix nyinhcaen guh gijmaz, lujlai di couh ndaej lo, swiq



ndaej caiq seuq, daengz haemh gwn caeuz lij yungh ne!" Dahcej swiq aen he hawj gou yawj, gou ciuq gij yiengh dahcej bae guh, aenvanjan caen swiq seuq lo, mbouj yaep he, gou couh dawz vanj swiq sat lo.

Gou yawj gij vanj swihgeij swiq haenx, aen' aen cungj seuqsaksak wenjmyagmyag, ngeix mbouj daengz swiq vanj hix aeu miz banhfap ndei cij swiq ndaej seuq bw.

(指导老师:陆雪燕)



Gou Gvaez Mbin

我喜欢飞

三江同乐小学四(1)班 覃玉花

Gou daj iq couh gvaez mbin, aiq dwg aenvih mwh iq daxboh ciengzciengz umj gou mbin bae mbin dauq ba. Seizneix daxboh gaenq umj mbouj hwnj gou lo, hoeng gou lij gig siengj mbin.

Gou hai aen congheue, hozhaenz dwk yawj gij roeg gwnzmbwn cwxcaih mbin bae mbin dauq, gou gag siengj, danghnaeuz gou miz doiq fwed he, gou itdingh mbin daengz gwnzmbwn bae, caeuq dujfwj guhdoi. Dou ngaemgyaeuj doxcaez yawj baenz diuz baenz diuz dahiq sawndik, doxcaez yawj baenz benq baenz benq doenghnaz henjgim, doxcaez yawj daxboh daxmeh gaenxgyaek guhhong, doxcaez yawj gyoengq lwgnyez guhcaemz. Mbin ha mbin ha! Gou caeuq duzroeg doxlwnh gij angqyangz mbin, gou doiq fwjnding fwjhenj ciengq diuz go ndeidingq vaiqvued he, gou gangj goj mizyinx ndaw hagdanz hawj ndaundeiq dingq.

Gou danghnaeuz caen rox mbin geijlai ndei ha!

(指导老师:龙宇)

Daxboh Bienq "Gik" Lo

爸爸变“懒”了

Mboengqneix, gou roxnyinh daxboh bienq gik lo, mbouj lumj gaxgonq yienghhaenx yienghyienh cungj bang gou lo.

Gaxgonq, daxboh cungj dwg soengq gou bae hagdanz cieq gou cuengqhag ma ranz. Hoeng seizneix, de cungj dwg hawj gou gag aemq daehsaw bae hagdanz caeuq ma ranz. Ma ranz guh cozyez seiz, daxboh mbouj caiq bang gou buen daiz, dawz daengq, cix dwg heuh gou gag guh. Bingzseiz, de lij seiz mbouj seiz heuh gou guh di hongranz, lumj swiq vanj, saeg mad, baeb denz, baet ranz. De lij ciengzciengz heuh gou bae bang de cawx doxgaiq dem.

Daxboh caen dwg bienq gik ha? Dangyienz mbouj dwg! Gou rox daxboh dwg hawj gou bienq gaenx, hag rox gag guh, mbouj gauq bouxwnq. Daxboh caen dwg miz sim ha!

(seiq nienzgaep Yij Youz)



Doekfwn Gvaq Laeng

下雨过后

贵港市覃塘区蒙公乡高占小学二(1)班 邓良宇



Miz ngoenz singhgiz roek ndeu gyanghaet, gwnzmbwn doek fwn gig hung, rumz ci dwk ngafaex ngauz bae ngauz dauq.

Doekfwn gvaq le, gou couh bae laj gorungz, yawjyawj miz mbouj miz roegiq doek roengzdaeuj. Gou yawjraen miz haujlai rongzroeg doek youq gwnz dieg, gou couh baenz aen baenz

aen rongzroeg bae ra roegiq. Gou ra ndaej roek duz roeglw, gij fwed roeglw cungj dumz liux. Gou dawz roeglw daiq ma ranz, aeu cuihfunghgih boq hawq gij bwn roeglw, yienzhaeuh aeu ceij daeuj guh aen rongz hawj roeglw, youq laj rongzceij bu di ceij unqnupnup he. Gou dawz roeglw cuengq haeuj ndaw rongzceij bae le, gou couh aeu boiq cang raemx caeuq ngaiz daeuj gueng roeglw. Moix ngoenz cuengqhag dauqma, gou cungj bae gaeb daek gaeb non

ma gueng roeglw. Gij roeglw moix baez raen gou dauqma seiz, cungj cici caca heuh mbouj dingz, lumjbaenz doiq gou gangj: "Docih mwngz, bouxcaw iq!"

Gvaq buenq ndwen le, roeglw maj fwed lo, rox mbin lo. Gou dawz gyoengqde cuengq okbae, yawjraen roeglw bek fwed angq heuh mbin bae giz gvae, gou ndawsim gig angq, hoeng, youh miz di sij mbouj ndaej. "Roeglw, caiqraen lo!"

(指导老师:朱卫明)